



**"Қазақстан Республикасының Үкіметі мен Ресей Федерациясының Үкіметі арасындағы "KAZSAT" байланыс және хабар таратудың қазақстандық спутнигін жасау жөніндегі ынтымақтастық туралы келісімді бекіту туралы" Қазақстан Республикасы Заңының жобасы туралы**

Қазақстан Республикасы Үкіметінің 2005 жылғы 14 мамырдағы N 456 Қаулысы

Қазақстан Республикасының Үкіметі **ҚАУЛЫ ЕТЕДІ:**

"Қазақстан Республикасының Үкіметі мен Ресей Федерациясының Үкіметі арасындағы "KAZSAT" байланыс және хабар таратудың қазақстандық спутнигін жасау жөніндегі ынтымақтастық туралы келісімді бекіту туралы" Қазақстан Республикасы Заңының жобасы Қазақстан Республикасының Парламенті Мәжілісінің қарауына енгізілсін.

*Қ а з а қ с т а н            Р е с п у б л и к а с ы н ы ң*

*Премьер-Министрі*

Жоба

**Қазақстан Республикасының  
ЗАҢЫ**

**Қазақстан Республикасының Үкіметі мен Ресей  
Федерациясының Үкіметі арасындағы "KAZSAT" байланыс  
және хабар таратудың қазақстандық спутнигін жасау  
жөніндегі ынтымақтастық туралы келісімді бекіту туралы**

2005 жылғы 18 қаңтарда Мәскеу қаласында жасалған Қазақстан Республикасының Үкіметі мен Ресей Федерациясының Үкіметі арасындағы "KAZSAT" байланыс және хабар таратудың қазақстандық спутнигін жасау жөніндегі ынтымақтастық туралы келісім бекітілсін.

*Қ а з а қ с т а н            Р е с п у б л и к а с ы н ы ң*

*Президенті*

**Қазақстан Республикасының Үкіметі мен Ресей  
Федерациясының Үкіметі арасындағы "KAZSAT" байланыс  
және хабар таратудың қазақстандық спутнигін жасау  
жөніндегі ынтымақтастық туралы  
КЕЛІСІМ**

Бұдан әрі Тараптар деп аталатын Қазақстан Республикасының Үкіметі мен Ресей  
Ф е д е р а ц и я с ы н ы ң Ү к і м е т і ,

1994 жылғы 28 наурыздағы Қазақстан Республикасы мен Ресей Федерациясы арасындағы "Байқоңыр" ғарыш айлағын пайдаланудың негізгі қағидаттары мен шарттары туралы келісімді, 2004 жылғы 9 қаңтардағы Қазақстан Республикасы мен Ресей Федерациясы арасындағы "Байқоңыр" кешенін тиімді пайдалану жөніндегі ынтымақтастықты дамыту туралы келісімді және 1994 жылғы 10 желтоқсандағы Қазақстан Республикасының Үкіметі мен Ресей Федерациясының Үкіметі арасындағы "Байқоңыр" кешенін жалдау шартын назарға ала отырып,

Қазақстан Республикасы мен Ресей Федерациясы арасындағы ғарыш кеңістігін игеру және пайдалану саласында өзара тиімді ынтымақтастықты дамыту мүдделерін негізге ала отырып ,

төмендегілер туралы келісті:

### **1-бап**

Осы Келісімнің мақсаты "KAZSAT" (бұдан әрі - "KAZSAT") байланыс және хабар таратудың қазақстандық спутнигін жасау, оны геостационарлық орбитаға шығару және оның базасында ғарыштық байланыс пен хабар таратудың қазақстандық жүйесін жасау жөніндегі Тараптардың ынтымақтастығын жүзеге асыруға арналған негізгі қағидаттар мен шарттарды айқындау болып табылады.

### **2-бап**

Осы Келісімді орындау үшін ынтымақтастық халықаралық құқықтың жалпы танылған нормалары мен қағидаттары сақтала отырып және Тараптардың өз мемлекеттері қатысушылары болып табылатын басқа Келісімдер бойынша міндеттемелерді орындауына залал келтірілместен Тараптар мемлекеттерінің осы Келісімге қайшы келмейтін заңнамаларына сәйкес жүзеге асырылады.

### **3-бап**

Осы Келісім бойынша уәкілетті органдар:

Қазақстан Тарапынан - Қазақстан Республикасы Ақпараттандыру және байланыс агенттігі, Қазақстан Республикасы Білім және ғылым министрлігі;

Ресей Тарапынан - Федералдық ғарыш агенттігі мен Ресей Федерациясы Ақпараттық технологиялар және байланыс министрлігі болып табылады.

Осы Келісімнің шеңберінде қазақстандық "KAZSAT" спутнигін әзірлеу, дайындау, геостационарлық орбитаға ұшыру және кейіннен пайдалану жөніндегі міндеттемелерді орындаумен, сондай-ақ Қазақстан Республикасының аумағында жерүсті басқару

кешенін және байланыс мониторингі жүйесін жасаумен байланысты нақты жұмыстарды (қызметтерді) орындау (көрсету) жөніндегі ынтымақтас ұйымдар (бұдан әрі - ынтымақтас ұйымдар) :

Қазақстан Тарапынан - "Ғарыштық байланыс және радиоэлектрондық құралдардың электромагниттік үйлесімділігі республикалық орталығы" акционерлік қоғамы, "Казсат" акционерлік қоғамы ;

Ресей Тарапынан - "М.В. Хруничев атындағы Мемлекеттік ғарыш ғылыми-өндірістік орталығы" федералдық мемлекеттік біртұтас кәсіпорны және "Ғарыштық байланыс" федералдық мемлекеттік біртұтас кәсіпорны болып табылады.

Тараптар өздерінің уәкілетті органдары мен ынтымақтас ұйымдары өзгерген жағдайда дипломатиялық арналар бойынша бір-бірін жедел хабардар етеді.

#### **4-бап**

"KAZSAT" спутнигі геостационарлық орбитаға шығарылады және Тараптар мемлекеттерінің орбиталық-жиіліктік ресурсты халықаралық үйлестіру мәселелерін айқындайтын байланыс әкімшіліктерінің арасындағы жеке келісіммен көзделетін, "KAZSAT" спутнигі үшін қажетті жиіліктік-поляризациялық жоспарға сәйкес Тараптардың келісімі бойынша айқындалатын геостационарлық орбитада уақытша берілген үйлестірілген ресейлік орбиталық позицияда орналастырылады.

#### **5-бап**

Ынтымақтас ұйымдар "KAZSAT" спутнигінің, жерүсті басқару кешені мен байланыс және хабар тарату қазақстандық ғарыштық жүйесі байланыс мониторингі жүйесінің, орбиталық-жиіліктік ресурсының келісілген талаптары мен сипаттамаларын, сондай-ақ "KAZSAT" спутнигі мен жерүсті басқару кешені объектілерін және байланыс мониторингі жүйелерін пайдалануға тапсыру-қабылдап алу, қазақстандық персоналды даярлау мен оқыту шарттарын айқындайды және оларды жасалатын келісім-шарттардың (шарттардың) негізінде іске асырады.

#### **6-бап**

Осы Келісімнің шеңберінде жүргізілетін ұйымдастырушылық, қаржылық, құқықтық және техникалық сипаттағы жұмыстар жөніндегі қағидаттар, нормалар және рәсімдер жекелеген келісім-шарттардың (шарттардың) нысанасы болып табылады.

Тараптар ынтымақтас ұйымдар жасасқан жекелеген келісім-шарттардан (шарттардан) туындайтын міндеттемелер бойынша жауаптылықта болмайды.

#### **7-бап**

Қазақстан Тарабы осы Келісімнің шеңберінде:  
қажетті көлемдегі жұмыстар мен қызметтерді қаржыландыруды;  
Қазақстан Республикасының аумағында "KAZSAT" спутнигін жерүсті басқару кешенін, сондай-ақ байланыс мониторингі жүйесінің байланыс және хабар тарату қазақстандық ғарыштық жүйесін орналастыру және пайдалану үшін қажетті жерүсті инфрақұрылым объектілерін құруды қамтамасыз етеді.

## **8-бап**

Байланыс және хабар тарату қазақстандық ғарыштық жүйесі бойынша Халықаралық электр байланысы одағымен қарастырылған үйлестіру іс-шараларын ескере отырып, "KAZSAT" спутнигін ұшыру сәтінде геостационарлық орбитадағы уақытша бос орбиталық-жиіліктік ресурсқа иелік ететін Ресей Тарабы Қазақстан Тарабына уақытша негізде (спутниктің орбитада белсенді түрде болу мерзіміне, бірақ 15 жылдан көп емес) Тараптардың келісімі бойынша қолданыстағы халықаралық үйлестіру келісімдерін ескере отырып, "KAZSAT" спутнигі үшін қажетті жиіліктік-поляризациялық жоспарға сәйкес үйлестірілген орбиталық-жиіліктік ресурсты береді.

Тараптар радиожіліктік спектрді бөлу мәселелері бойынша ақпаратпен алмасуды жүзеге асырады және жиіліктердің бөлінуін бірлесіп қорғау мәселелерін қоса алғанда, Халықаралық электр байланысы одағында орбиталық-жиіліктік берулерді үйлестіру мәселелерінде бір-біріне жәрдемдеседі.

## **9-бап**

Тараптар 1975 жылғы 14 қаңтардағы Ғарыш кеңістігіне ұшыратын объектілерді тіркеу туралы конвенцияға сәйкес "KAZSAT" спутнигін геостационарлық орбитадағы ғарыштық объект ретінде тіркеуді бірлесіп қамтамасыз етеді.

## **10-бап**

Қазақстан Республикасының кедендік аумағына, соның ішінде қазақстандық "KAZSAT" спутнигін жасау, жерүсті басқару кешені мен байланыс және хабар тарату қазақстандық ғарыштық жүйесінің байланыс мониторингі жүйесін жасау мен оны орбитаға ұшыру мақсаты үшін үшінші елдерден әкелінетін қосалқы жабдықты, бағдарламалық қамтамасыз етуді қоса алғанда, жабдық және оның жиынтықтары Қазақстан Республикасының аумағында кедендік төлемдер алудан, салықтар мен өзге де алымдардан толық босатылады деп келісті.

Аталған жабдықты және оның жиынтықтарын кедендік ресімдеу Қазақстан Тарабы мемлекеттік органдарының лицензиялары мен басқа да рұқсаттары ұсынылмастан, тек

Қазақстан Тарабының уәкілетті органы беретін, осы Келісімнің мақсатында олардың пайдаланылатынын растайтын құжат болған кезде жүзеге асырылады.

## **11-бап**

Тараптар осы Келісімнің шеңберінде жұмыстарды орындау барысында пайдаланылатын зияткерлік меншікті қорғауды Тараптар мемлекеттерінің заңнамаларына, сондай-ақ қатысушысы бір уақытта Тараптардың мемлекеттері болып табылатын халықаралық шарттарға сәйкес қамтамасыз етеді.

Осы Келісім шеңберіндегі ынтымақтастық Тараптардың және ынтымақтас ұйымдардың осы Келісім шеңберінде немесе осы Келісімге байланыссыз бірлескен қызмет басталғанға дейін алған олардың зияткерлік меншік құқықтарын қозғамайды.

## **12-бап**

Тараптар, уәкілетті органдар және ынтымақтас ұйымдар Тараптар мемлекеттерінің заңнамаларында және осы Келісімде белгіленген тәртіппен жасырын ақпарат алмасуды ж ү з е г е а с ы р а д ы .

Жасырын ақпаратты Тараптар, уәкілетті органдар және ынтымақтас ұйымдар көрсетілген ақпараттың жеткізгішіне "Жасырын" деген белгі қою жолымен таңбалайды . Мұндай таңбалау үшін жауапкершілік ақпараты осындай жасырындылықты талап ететін Тарапқа, уәкілетті органға немесе ынтымақтас ұйымға жүктеледі.

Құпия ақпаратты беру және қорғау беруші Тарап мемлекетінің заңнамасында және 2004 жылғы 7 шілдедегі Қазақстан Республикасының Үкіметі мен Ресей Федерациясының Үкіметі арасындағы Құпия ақпаратты өзара қорғау туралы келісімде көзделген тәртіппен жүзеге асырылады.

Әрбір Тарап, оның уәкілетті органы немесе ынтымақтас ұйым екінші Тараптан, оның уәкілетті органынан немесе ынтымақтас ұйымнан алған құпия және/немесе жасырын ақпаратты өз мемлекетінің заңнамасына сәйкес қорғайды.

Осы Келісім шеңберінде орындалған бірлескен әзірлемелер туралы кез келген ақпарат оның қатысушысы болып табылмайтын үшінші тараптарға тек Тараптардың жазбаша түрде ресімделген келісімі бойынша берілуі мүмкін.

## **13-бап**

Тараптар және олардың уәкілетті органдары өзара келісім бойынша осы Келісімнің шеңберіндегі қызмет туралы жұртшылықты хабардар ете алады.

## **14-бап**

Осы Келісімді түсіндіруге және/немесе іске асыруға байланысты даулар туындаған жағдайда Тараптар немесе олардың уәкілетті органдары оларды реттеу үшін консультациялар немесе келіссөздер жүргізеді.

Осы баптың бірінші абзацымен көзделген рәсімдерге сәйкес реттелмеген даулар Тараптардың біреуі екінші Тарапқа осындай реттеу туралы жазбаша сұрау жібергеннен кейін 6 (алты) ай ішінде Тараптардың кез келгенінің өтініші бойынша төрелік сотқа жіберілуі мүмкін. Төрелік сотты құру тәртібі мен жұмыс жасау шарттары осы Келісімге қол қойылған күннен бастап бір жыл ішінде Тараптар жасайтын жеке келісіммен белгіленеді.

## **15-бап**

Осы Келісім қол қойылған күнінен бастап уақытша қолданылады және оның күшіне енуі үшін қажетті мемлекетішілік рәсімдерді Тараптардың орындағаны туралы соңғы жазбаша хабарлама алынған күнінен бастап күшіне енеді.

Осы Келісім Тараптар өздеріне алған міндеттемелерді толық орындағанға дейін қолданылады.

Кез келген Тарап екінші Тарапқа осы Келісімнің қолданылуын тоқтату болжамдалған күнге дейін кемінде 6 (алты) ай бұрын оның қолданылуын тоқтату ниеті туралы жазбаша хабарлама жіберу жолымен оны тоқтата алады.

Осы Келісімнің қолданылуын тоқтату оның қолданылуы тоқтатылғанға дейін заңды тұлғалардың осы Келісімнің орындалуына байланысты туындаған құқықтарын немесе міндеттемелерін қайта қарау үшін құқықтық негіз бола алмайды.

Осы Келісімге Тараптар арасында жеке хаттамалар жасасу жолымен өзгерістер мен толықтырулар енгізілуі мүмкін. Аталған хаттамалар осы Келісімнің күшіне енуі үшін көзделген тәртіпте күшіне енеді.

2005 жылғы 18 қаңтарда Мәскеу қаласында қазақ және орыс тілдерінде әрқайсысы екі түпнұсқа данада жасалды әрі екі мәтіннің күші бірдей.

*Қазақстан Республикасының*  
*Үкіметі үшін*

*Ресей Федерациясының*

*Үкіметі үшін*